

白猿傳

唐江摠撰

梁大同末遣平南將軍藺欽南征至桂林破李  
師古陳徹別將歐陽紇略地至長樂悉平諸洞  
深入險阻紇妻織白甚美其部人曰將軍何爲  
挈麗人經此地有神善竊少女而美者尤所難  
免宜謹護之紇甚疑懼夜勒兵環其廬匿婦密  
室中謹閉甚固而以女奴十餘伺守之再夕陰  
風晦黑至五更寂然無聞守者怠而假寐忽若

有物驚悟者卽已失妻矣。關扃如故，莫知所出。出門山嶮咫尺，迷悶不可尋逐。迨明絕無其跡，紇大憤痛，誓不徒還。因辭疾，駐其軍，日往四遐，卽深凌嶮以索之。旣逾月，忽於百里之外叢篠上得其妻，繡履一隻，雖浸雨濡，猶可辨識。紇尤懷悼，求之益堅。選壯士三十人，持兵負糧，巖棲野食，又旬餘，遠所舍約二百里，南望一山葱秀，迥出至其下，有深溪環之，乃編木以度，絕巖翠竹之間，時見紅綵，聞笑語音，捫蘿引絙而陟其

上，則嘉樹列植，間以名花，其下綠蕪豐軟如毯，清迥岑寂杳然，殊境。東向石門，有婦人數十，帔服鮮澤，嬉遊歌笑，出入其中，見人皆慢視，遲立至，則問曰：何因來此？紇具以對，相視歎曰：賢妻至此月餘矣。今病在牀，宜遣視之。入其門，以木爲扉，中寬闢若堂者，三四壁設牀，悉施錦薦，其妻卧石榻上，重茵累席，珍食盈前。紇就視之，迴眸一睇，卽疾揮手令去。諸婦人曰：我等與公之妻比來久者十年，此神物所居，力能殺人，雖百

夫操兵不能制也幸其未返宜速避之但求美  
酒兩斛食犬十頭麻數十斤當相與謀殺之其  
來必以正午後慎勿太早以十日爲期因促之  
去紇亦遽退遂求醇醪與麻犬如期而往婦人  
曰彼好酒徃徃致醉醉必騁力俾吾等以綵練  
縛手足於牀一踊皆斷常紉三幅則力盡不解  
今麻隱帛中束之度不能矣遍體皆如鐵唯臍  
下數寸常護蔽之此必不能禦兵刃指其傍一  
巖曰此其食廩當隱於是靜而伺之酒置花下

犬散林中待吾計成招之卽出如其言屏氣以  
俟日晡有物如匹練自他山下透至若飛徑入  
洞中少選有美髯丈夫長六尺餘白衣曳杖擁  
諸婦人而出見犬驚視騰身執之披裂吮咀食  
之致飽婦人競以玉杯進酒諧笑甚歡旣飲數  
斗則扶之而去又聞嬉笑之音良久婦人出招  
之乃持兵而入見大白猿縛四足於牀頭顧人  
蹙縮求脫不得目光如電競兵之如中鐵石刺  
其臍下卽飲刃血射如注乃大歎咤曰此天殺

我豈爾之能然爾婦已孕勿殺其子將逢聖帝  
必大而宗言絕乃死搜其藏寶器豐積珍羞盈  
品羅列杯案凡人世所珍靡不充備名香數斛  
寶劍一雙婦人三十輩皆絕其色久者至十年  
云色衰必被堤去莫知所置又捕採唯止其身  
更無黨類旦盥洗著帽加白衿被素羅衣不知  
寒暑遍身白毛長數寸所居常讀水簡字若符  
篆了不可識已則置石磴下晴晝或舞雙劍環  
身電飛光圓若月其飲食無常喜嚼果栗尤嗜

犬咀而飲其血日始逾午卽欬然而逝半晝往  
返數千里及晚必歸此其常也所須無不立得  
夜就諸牀嬲戲一夕皆周末嘗寢寐言語淹詳  
華吉會利然其狀卽猴獮類也今歲木葉之初  
忽愴然曰吾爲山神所訴將得死罪亦求護之  
於衆靈庶幾可免前月哉生魄石磴生火焚其  
簡書悵然自失曰吾已千歲而無子今有子死  
期至矣因顧諸女汎瀾者久之且曰此山復絕  
未常有人至之高而望絕不見樵者下多虎狼

怪獸今能至者非天假之何耶紇卽取寶玉珍  
麗及諸婦人以歸猶有知其家者紇妻周歲生  
一子厥狀肖焉後紇爲陳武帝所誅素與江摠  
善愛其子聰悟絕人常留養之故免於難及長  
果文學善書知名於時

唐歐陽率更貌寢長孫太尉嘲之有誰言麟  
閣上畫此一獼猴之語後人緣此遂托江摠  
撰傳以誣之蓋藝家遊戲三昧如毛穎革華  
之流爾吾黨但貴其資談微供諧噓安問其

事之有無

虞初志卷八終

虞初志

卷八



Red seal impression containing Japanese characters in seal script.

